

RELATO DI PRENSA

RAPPORT OPERACIONAL 2019: BANCO CENTRAL DI ARUBA TA MANTENE UN POSICION FINANCIERO SOLIDO Y TA INVERTI DEN CALIDAD Y INNOVACION

Oranjestad, 3 december 2020 - Awe Banco Central di Aruba (BCA) ta publica su “Operational Report 2019”. Den e rapport aki tin un resumen di e resultado financiero pa 2019, su mandato y obhetivonan di maneho principal manera poni den e Ordenansa di Banco Central y tambe e logronan importante relaciona cu su plan strategico “Bela Yen: Nos Plan Strategico 2016-2020”.

E rapport aki ta duna un bista riba e desaroyonan y actividadnan principal den e sector monetario y financiero y e sistema di pago, hunto cu actividadnan operacional primario ehecuta door di BCA durante 2019. Pa loke ta trata su actividadnan, un logro clave tabata e introduccion di e serie nobo y innovativo 2019 di placa di papel reemplasando e serie 2003. Cu mas di 80 por ciento di e serie 2003 cambia door di e publico na final di 2019, BCA ta conclui cu e comunidad Arubano a acepta e placa di papel nobo den un forma excepcional. Ademas, e 100 florin di e serie 2019 di placa di papel recientemente a gana e prestigioso premio internacional “2019 Banknote of the Year Award of the International Bank Note Society”.



BCA ta igualmente orguyoso cu a logra alcanza un grupo grandi di mucha pa medio di su programanan “Global Money Week Aruba (GMWA)” y “Cyber School Aruba”, promoviendo educacion financiero y conocimiento riba tereno di “cybersecurity”. BCA ta kere firmemente den educacion di e futuro generacionnan di Aruba riba e importancia di tin habilidad y conocimiento financiero adecua. Pa e motibo ey, BCA a lidera e iniciativa pa anualmente organisa un programa nacional di educacion financiero via GMWA usando e modelo di ciclo financiero cu ta cubri 7 topico (Discubri, Siña, Innova, Gana, Gasta, Spaar y Comparti). Y pa medio di e programanan di Cyber School Aruba, BCA ta contribui na mehora e vigilancia di muchanan ora nan ta usando internet y ta “online” y nan abilidadnan digital. Cu e dos programa importante aki, cu un alcance di aproximadamente 680 mucha na Aruba, BCA ta aspira pa inverti den un miho futuro pa nos muchanan.

BCA su maneho pa cu **reservananan internacional a keda prudente durante 2019**, manteniendo asina e reservanan na un nivel apropia, mientras ta provee suficiente likides na e sector bancario pa asina **fomenta confiansa den e tasa fiho di e florin pa cu e dollar Americano**.



CENTRALE BANK VAN ARUBA

E posicion financiero di BCA a keda solido durante 2019

- **Entrada netto di interes.** E fuente primario di entrada, esta e ganashinan di su portofolio di inversion di divisa, a mehora reflehando e desaroyo positivo den e mercado financiero global den 2019 y e repocision na tempo di e portofolio di inversion na comienso di 2019 pa asina probecha di e rendimiento mas halto e tempo ey.
- **Otro entradanan.** E otro entradanan ta consisti di benta di divisa y moneda di florin, compensacion di margen di divisa y otro entradanan manera costonan di supervision paga door di institucionnan financiero supervisa door di BCA y boetnan imponi door di BCA. E aumento marginal den e componente aki ta mas tanto debi na e benta di divisa na gobierno di Aruba pa por cumpli cu su pagonan di debenan externo. Gobierno a financia esaki completamente door di emiti bononan riba e mercado financiero domestico durante 2019.

Na mesun momento BCA a mantene su gastonan modera door di un vigilancia estricto di esaki.

- **Gastonan di personal.** E aumento den gastonan di personal durante 2019 ta debi mas tanto na curso, seminario y conferencianan atendi door di personal di BCA, y tambe gastonan relaciona cu contractnan cu personal nobo pa BCA compara cu 2018.
- **Gastonan operacional.** Gastonan operacional a baha na 2019 compara cu 2018 principalmente door di gastonan legal y di “consultancy” mas abou. Tabatin gastonan adicional door di mas conferencia y seminario organisa door di BCA compara cu 2018, entre nan “**The Future of an Aruban Circular Economy**” teni na november 2019. E meta di e conferencia aki tabata pa **promove un economia Arubano circulario cu limitenan social-ecologico responsabel, capacidad institucional solido, un ecosistema innovativo, un forza laboral productivo, un maneho fiscal sostenibel y un capacidad economico di recuperacion pa proteha Aruba su futuro.**

E pandemia di COVID-19

E pandemia relaciona cu COVID-19 tin un impacto sin precedente riba Aruba su economia. Mientras cu e medidanan di gobierno di Aruba pa contene e contagio di COVID-19 riba nos isla pa asina mitiga su efectonan adverso riba e salud di e poblacion ta di elogio, esaki lamentabelmente tambe a conduci na pone hopi stress riba e economia cu perdida di entrada for di turismo, practicamente e unico pilar economico. Pa parcialmente mitiga e efectonan negativo aki, BCA a tuma diferente medida riba tereno monetario, prudencial y di divisa. E ultimo principalmente pa proteha e nivel di divisa debi na e caida practicamente completo for di entrada di turismo.

Cu e proposito pa informa, BCA a inclui varios indicador importante pa e periodo te cu juni 2020 den su “Operational Report 2019”.



CENTRALE BANK VAN ARUBA

Pa motibo cu gobierno di Aruba a opta pa gradualmente habri back Aruba su economia y cautelosamente yama bon bini na turistanan atrobe na nos isla, actividadnan economico ta recuperando poco poco, provee asina trabou y entrada necesario pa e sector publico y priva. Pa mas detaye riba e pronostico di e Productu Bruto Domestico (e asina yama GDP), por referi na e publicacion di BCA “Economic Outlook October 2020” riba su website www.cbaruba.org.

Tambe e **“Operational Report 2019”** ta disponibel desde awe riba e mesun website aki.